



TERENGGANU DARUL IMAN
TAMBAHAN PERUNDANGAN
AKTA KERAJAAN TEMPATAN 1976
Tr. P.U. 11/93
UNDANG-UNDANG KECIL VANDALISME
(MAJLIS DAERAH DUNGUN) 1992

Tarikh penyiaran :
Tarikh mula berkuatkuasa :

8 Julai 1993
8 Julai 1993

SUSUNAN UNDANG-UNDANG KECIL

Mukadimah

- Undang-undang kecil 1. Nama pemakaian dan mula berkuatkuasa.
- Undang-undang kecil 2. Tafsiran.
- Undang-undang kecil 3. Kesalahan-kesalahan dan penalti.
- Undang-undang kecil 4. Kuasa menyita dsb.

Mukadimah

Pada menjalankan kuasa-kuasa yang diberi oleh seksyen 102 Akta Kerajaan Tempatan 1976 [*Akta 171*], Majlis Daerah Dungun membuat, dan menurut seksyen 103, Akta tersebut Pihak Berkuasa Negeri mengesahkan, Undang-Undang kecil berikut:-

1. Nama pemakaian dan mula berkuatkuasa.

Undang-Undang Kecil ini bolehlah dinamakan **Undang-undang Kecil Vandalisme (Majlis Daerah Dungun) 1992** dan hendaklah terpakai bagi kawasan Majlis Daerah Dungun dan hendaklah mula berkuatkuasa pada tarikh ianya disiarkan dalam *Warta*.

2. Tafsiran.

Dalam undang-undang kecil ini, melainkan jika konteksnya menghendaki makna yang lain: -

“binatang” termasuk burung, seranggan dan hidupan liar;

“Majlis” ertinya Majlis Daerah Dungun;

“Yang Dipertua” ertinya Yang Dipertua Majlis Daerah Dungun dan termasuk Timbalan Yang Dipertua;

“tempat persendirian” ertinya mana-mana tempat selain daripada tempat awam;

“harta Majlis” ertinya apa-apa harta alih dan tidak alih yang dipunyai, dibina, diuruskan atau diselenggarakan oleh Majlis yang terletak atau yang ada di dalam, di bawah atau di atas, mana-mana tempat awam atau persendirian di dalam kawasan Majlis dan apa-apa harta mana-mana pihak atau orang yang berkontrak dengan Majlis yang digunakan bagi maksud memenuhi atau melaksanakan kontrak itu dan termasuklah apa-apa kerja yang dijalankan oleh Majlis dan mana-mana binatang, pokok, tumbuh-tumbuhan, rumput, sungai, tasik, pulau, anak sungai, lagun dan pantai yang dibawah penjagaan dan kawalan Majlis;

“tempat awam” mempunyai erti yang sama seperti dalam Akta Kerajaan Tempatan, 1976;

“Setiausaha” ertinya Setiausaha Majlis Daerah Dungun;

“kerja” ertinya mana-mana kerja yang dijalankan oleh Majlis di bawah mana-mana undang-undang bertulis yang ada di dalam, di bawah atau di atas mana-mana tempat awam atau persendirian di dalam kawasan Majlis.

3. Kesalahan-kesalahan dan penalti.

(1) Tiada seorang pun boleh, melainkan jika kebenaran atau kuasa baginya diberikan secara bertulis oleh Majlis,

- (a) menulis, melukis mengecat, menyembur, menanda, mencalar, atau mengukir apa-apa perkataan, slogan, karikatur, symbol, atau apa-apa jua pun di atas harta Majlis;
- (b) memasang, meletakkan, menampalkan, menunjukkan atau mempamirkan apa-apa poster, pelekat, iklan, surat tempelan, peringatan kertas atau apa-apa dokumen di atas harta Majlis;
- (c) menggantung, menyangkut, menaikkan, melekatkan atau mempamirkan apa-apa bendera, panji-panji hiasan, panji-panji bendera, sepanduk atau yang menyerupainya dengan sesuatu slogan, karikatur, lukisan, symbol atau apa-apa perkataan lain di atas harta Majlis;
- (d) memakukan, mengikat, menyimpul atau merantai apa-apa benda ke atas harta Majlis;
- (e) mencuri, mengalih, mengganggu, mengusik, memindah, mencacatkan, merosakkan atau memusnahkan apa-apa harta Majlis;
- (f) membuat apa-apa ubahan kepada apa-apa harta Majlis;
- (g) mengalih, memindah, mengusik, mencacatkan, merosakkan atau memusnahkan apa-apa jua yang dipertunjukkan, digantung, didirikan, dilekatkan, dinaikkan, atau disangkutkan oleh Majlis;
- (h) meludah, kencing atau membuang air besar di dalam atau di atas mana-mana harta Majlis kecuali di tempat yang telah disediakan bagi maksud itu;
- (i) mengotorkan atau mencemarkan air di mana-mana pancutan air, kolam renang, sungai, tasik atau anak-anak sungai yang di bawah penjagaan dan kawalan Majlis;
- (j) memotong, menggali, mengalih, memetik, membantun, merosakkan atau memusnahkan mana-mana pokok, tumbuh-tumbuhan, bunga, daun, atau dahan-mana-mana pokok atau tumbuh-tumbuhan atau rumput yang di bawah penjagaan dan kawalan Majlis;
- (k) mengorek atau mengalih tanah dari mana-mana harta Majlis;

- (l) memerangkap, menangkap, mendera membunuh, memberi makan atau mengganggu mana-mana binatang kepunyaan Majlis atau yang di bawah penjagaan dan kawalan Majlis;
- (m) menunggang, memandu, menolak atau menarik apa-apa kenderaan sama ada yang digerakkan secara mekanikal atau melincur dengan skate di atas mana-mana harta Majlis yang bukan dibenarkan bagi maksud itu, atau
- (n) Melakukan apa-apa perbuatan yang boleh menyebabkan kerosakan kepada harta Majlis.

(2) Mana-mana orang yang melakukan mana-mana perbuatan vandalisme yang tersebut di atas atau cuba melakukan mana-mana perbuatan itu atau menyebabkan mana-mana perbuatan itu dilakukan adalah melakukan suatu kesalahan dan apabila disabit boleh didenda tidak melebihi dua ribu ringgit atau dipenjarakan selama suatu tempoh yang tidak melebihi satu tahun atau denda dan penjara itu kedua-duanya, dan mengenai kesalahan yang berterusan boleh selanjutnya didenda tidak melebihi dua ratus ringgit bagi setiap hari selama tempoh kesalahan itu diteruskan selepas sabitan.

4. Kuasa menyita dsb.

(1) Yang Dipertua atau mana-mana pegawai Majlis yang diberi kuasa secara bertulis oleh Majlis boleh:

- (a) menyita atau mengalih apa-apa benda yang didapati bergantung, dinaikkan, ditampal, diikat, disimpul, dirantai, dipakukan, dilekatkan, disangkut, dipamirkan atau dipertunjukkan di atas mana-mana harta Majlis berlanggaran dengan mana-mana peruntukkan undang-undang kecil ini; atau
- (b) memadam apa-apa tulisan, gambar, lukisan, tanda, cakaran, calar atau ukiran yang dibuat oleh mana-mana orang berlanggaran dengan mana-mana peruntukkan undang-undang kecil ini.

(2) Apa-apa tindakan yang diambil oleh Yang Dipertua atau mana-mana pegawai Majlis yang di beri kuasa secara bertulis oleh Mahlis di bawah perenggan (1) tidak boleh ditafsirkan sebagai menghalang mana-mana orang daripada dikenakan pendakwaan bagi apa-apa kesalahan terhadap mana-mana peruntukkan undang-undang kecil ini.